

**Møre og Romsdal fylkeskommune  
ved fylkesordførar Jon Aasen**

## **Regionreforma og avklaring mot Møre og Romsdal**

Sogn og Fjordane, Hordaland og Rogaland fylkeskommunar har i 2016 greidd ut, og forhandla om, grunnlaget for ein ny folkevald region på Vestlandet. Forhandlingane resulterte som kjent i ein intensjonsplan som no i desember har vore handsama i fylkestinga i dei tre fylkeskommunane.

I Sogn og Fjordane (07.12.) og Hordaland (14.12.) gjorde fylkestinga positive vedtak i høve intensjonsplanen. Fylkestinget i Rogaland (13.12.) fann ikkje fleirtal for å gå vidare i regionreforma med intensjonsplanen som plattform.

Ved Stortinget si handsaming av Meld. St. 22 (2015-16) «Nye folkevalde regionar» var det eit klårt fleirtal for at dagens 19 fylkeskommunar bør reduserast til om lag 10 regionar. I brev av 22.08.16 bad statsråden fylkeskommunane tydeleggjere kva for regionstruktur ein ønskjer. Det vart synt til at lokale utgreiingar og regionale vedtak vil utgjere det sentrale grunnlaget for regjeringa sitt framlegg til ny regionstruktur. Statsråden framheva at ei vidareføring av noverande fylkesstruktur ikkje er eit alternativt resultat av regionreforma.

Fylkestinga i Sogn og Fjordane og Hordaland meiner at fylkeskommunane sjølve må ha ei reell moglegheit til å finne tenlege løysingar for det framtidige regionnivået. Vi ønskjer ut frå dette, og med bakgrunn i våre fylkestingsvedtak, å gjennomføre nye regionforhandlingar mellom Sogn og Fjordane og Hordaland. Vi har difor 15.12.16 sendt ein førespurnad til KMD der vi har bede om aksept for å nytte tida fram til 03.02.17 til å avslutte eigne, lokale prosessar.

Frå Sogn og Fjordane fylkeskommune si side har det vore framheva at vi ønskjer å halde døra opa for Møre og Romsdal fylkeskommune. Fylkestinget bad difor gjennom vedtaket 07.12. (punkt 5) om at det oppnemnde forhandlingsutvalet opnar for å invitere Møre og Romsdal inn i nemnde forhandlingar for ei framtidig regionløyning.

Eg er samstundes kjend med Dykkar nylege fylkestingsvedtak, der fylkestinget går inn for at Møre og Romsdal fylkeskommune skal halde fram som eigen region frå 01.01.20.

Som fylkesordførar og leiar for forhandlingsutvalet i Sogn og Fjordane fylkeskommune vil eg, for ordens skuld, vidareformidle ønsket frå fylkestinget vårt. Samstundes ber eg om ei formell avklaring og tilbakemelding innan årsskiftet på om det er aktuelt for Møre og Romsdal å ta del i ein dialog og ev. forhandlingar om ei alternativ ny regionløyning i januar.

Ta gjerne kontakt med underteikna for ytterlegare spørsmål og informasjon.

Med helsing

Jenny Følling  
Fylkesordfører

*Brevet er elektronisk godkjent og er utan underskrift.*

Mottakar(ar):

Møre og Romsdal fylkeskommune  
ved fylkesordfører

Fylkeshuset  
Julsundvegen 9  
6404 MOLDE

Vedlegg:

Fylkestinget sitt vedtak i FT-sak 52/16 «Regionreforma og Sogn og Fjordane fylkeskommune».

## VEDLEGG

### **Fylkestinget i Sogn og Fjordane gjorde 07.12.16 slikt vedtak i FT-sak 52/16:**

1. Fylkestinget i Sogn og Fjordane er positiv til at det vert etablert ein sterk og attraktiv folkevald vestlandsregion med høg kvalitet i tenestene til innbyggjarane og ei framtidsretta samfunnsutvikling.
2. Fylkestinget legg til grunn at eit fleirtal i Stortinget i handsaminga av Meld. St. 22 (2015-16) tidlegare i år har sagt at tal folkevalde regionar skal reduserast vesentleg. Fylkestinget vil at Sogn og Fjordane vert ein del av ein større region, og syner i denne samanheng til intensjonsplanen av 15.09.2016 og den gjennomførte høyringsprosessen. Fylkestinget syner særleg til dei innkomne uttalane frå kommunane.

Fylkestinget vil, med grunnlag i inndelingslova, søkje statleg styresmakt om samanslåing med grunnlag i intensjonsplanen. Det er ein føresetnad at Hordaland og Rogaland fylkeskommunar søkjer tilsvarande.

Fylkestinget vil nemne opp sine representantar til fellesnemnda i april 2017, jf. inndelingslova § 26. Fylkestinget vil då også ta stilling til kva mandat og avgjerdsmynde fellesnemnda bør få.

3. Fylkestinget understrekar at det er heilt uakseptabelt å dele noverande Sogn og Fjordane mellom ulike regionar.
4. Fylkestinget legg intensjonsplanen av 15.09.16 til grunn for ein ny vestlandsregion, med følgjande presiseringar:
  - a) Det er ein viktig føresetnad at krava om oppgåver som er fremja i kapittel 10 i intensjonsplanen vert følgde opp frå sentrale styresmakter både når det gjeld eksisterande og nye oppgåver.
  - b) Den framtidige administrasjons- og tenestestrukturen må byggje på desentralisering, maktspreiing og prinsippet om å ta heile regionen i bruk. Tilsette må gjennom ein brukarnær og desentralisert struktur kunne utføre sine oppgåver innanfor alle sentrale fagområde og sektorar, sjølv om dei ikkje arbeider der den administrative leiinga har hovudsete. Ved framtidig rekruttering må dette prinsippet stå sentralt.
  - c) Fylkestinget i Sogn og Fjordane føreset at Vestlandsregionen skal ha nynorsk som administrasjonsspråk. Fylkestinget i Sogn og Fjordane føreset at Vestlandsregionen gjer vedtak om at staten bruker nynorsk til regionen.
  - d) Dersom dei nye folkevalde regionane (nasjonalt) får svært ulike innbyggjartal, må Stortinget kunne fråvike generalistprinsippet for oppgåvedeling mellom staten og regionane.
  - e) Ekspertutvalet som i 2017 skal opprettast i samband med regionreforma, må leggje til rette for at Stortinget kan overføre viktige samfunnsoppgåver frå statleg til regionalt folkevalt nivå. Både rolla som samfunnsutviklar og rolla som leverandør av offentlege tenester og velferdsytingar må styrkast. Fylkeskommunane må vere godt representerte i nemnde utval.
  - f) Fylkesmannsembetet på Vestlandet må få ei organisering og ei regional inndeling som samsvarer med det folkevalde regionale nivået sin geografiske struktur. Fylkesmannsembetet må få ei desentralisert forvaltning lokalisert i dagens fylke, med leiing frå Sogn og Fjordane.
  - g) Vi syner elles særleg til premissane i intensjonsplanen sitt kapittel 10, som også er omtala tidlegare i dette vedtaket.

5. Dersom dei andre fylkeskommunane gjennom vedtak på fylkestinga i desember 2016, ikkje går inn for etablering av ein vestlandsregion, går fylkestinget inn for at det oppnemnde forhandlingsutvalet for regionreforma får fullmakt til å starte og gjennomføre ny dialog og forhandlingar om alternativ ny regionløyning: Samanslåing av fylkeskommunane Sogn og Fjordane og Hordaland, der det også vert opna opp for å invitere Møre og Romsdal inn i forhandlingar om ei slik løyning.

Slike eventuelle forhandlingar føreset at Møre og Romsdal, innan utgangen av 2016, stadfestar at dei vil vere med å forhandle om ein intensjonsplan med ein struktur og eit detaljeringsnivå tilsvarande planen av 15.09.16. Møre og Romsdal må òg akseptere ei framdrift som gjev grunnlag for nye fylkestingsvedtak innan utgangen av januar 2017. Dette føreset at også Hordaland aksepterer ein slik invitasjon.

Dette føreset også at ein på statleg side aksepterer at vi får høve til å gjere nye fylkestingsvedtak innan utgangen av januar 2017.

I dette tilfelle gjeld pkt. 2, 2. og 3. avsnitt, og pkt. 4 tilsvarande, men då tilpassa dei fylkeskommunar som vert med på ei slik subsidiær løyning.

Fylkestinget vil nemne opp sine representantar til fellesnemnda i april 2017 jf. inndelingslova § 26. Fylkestinget vil då også ta stilling til kva mandat og avgjerdsmynde fellesnemnda bør få.